


昭忠祠列傳續編

卷七十一



昭忠祠列傳續編卷七十一

山西官員

道員

張錫蕃

知府

何維墀

遊擊



扎克當阿

直隸官員

副都統

佟鑑

張錫蕃傳

張錫蕃江蘇元和縣人。由監生於道光九年。報捐縣丞。分發廣東。十一年代理增城縣知縣。十二年連山徭匪滋事。兩廣總督盧坤檄錫蕃隨營襄辦文案。十三年事竣。奏請獎勵。得

旨免補本班。以不論繁簡知縣即補。十四年補

陽山縣知縣。十七年調番禺縣知縣。時
邑之黃埔鄉有犯煙禁者。株連甚眾。閭
閻騷動。錫蕃親自按治之。既抵鄉。張示
安民。禁兵差不得入民舍。乃獲犯事者
三人。寘之法。餘悉安堵。二十年四月升
佛岡廳同知。十一月調前山海防同知。
二十一年四月。暎夷犯順。逆船駛入廣

東海口。錫蕃辦理省城軍需總局事。平。
經靖逆將軍奕山。以守城出力保奏。

賞加升銜。二十二年署潮州府知府。二十三年
升安徽徽州府知府。二十四年安徽巡
撫王植。以鳳陽府民俗剽悍。治理繁蹟。
知府愛崇阿。人地未宜。請以錫蕃調補。
允之。旋署甯池太廣道。二十八年四月調安慶

府知府。八月。復署甯池太廣道。二十九年。夏間雨甚。沿江州縣。多被水災。十月。青陽縣知縣劉漢翼。催徵錢糧。縣民以逃荒為名。抗弗納。幾激成變。錫蕃奉檄。帶兵前往彈壓。入其境。召父老諭以大義。並反復陳利害。眾感悟。輸將如故。三十年八月。擢山西河東道。九月。以委辦

安徽清查完竣。下部議敘。咸豐三年五月。廣西會匪。由河南懷慶竄擾山西。錫蕃以巡撫哈芬檄。至茅津渡防堵。七月。調防垣曲縣。八月。賊陷垣曲。巡撫哈芬褫職留任。錫蕃亦革職。交哈芬查辦。尋因賊匪連陷絳縣曲沃。直撲平陽府城。布政使郭夢齡馳奏。哈芬逗遛潞州府。

尚未報入得

旨哈芬革職拏問。解京治罪。錫蕃亦拏問。交署
巡撫郭夢齡嚴訊。時錫蕃已於垣曲失守日

巷戰陣亡事

聞得

旨張錫蕃著開復革職處分。交部照例議卹。尋
賞卹如例。

恩給雲騎尉世職。子傳杰承襲。

何維墀傳

何維墀。奉天金州人。由拔貢生。於道光六年。

朝考引

見。以七品小京官用。籤分禮部。中道光十四年。舉人。十五年。升候補主事。十九年。補官。二十年。丁父憂。二十二年。服闋。升員外。

郎二十三年。

京察一等復帶引

見得

旨記名以道府用。二十五年正月升郎中。尋授
江西南昌府遺缺知府。四月補贛州府
知府。二十六年丁母憂。二十八年服闋。
三十年十月授山西太原府遺缺知府。

十一月補平陽府知府。咸豐三年四月
廣西會匪滋事。維墀以捐備軍餉。

賞加道銜。九月賊由河南懷慶竄入山西。連陷
垣曲。絳縣。曲沃。遂撲平陽府城。維墀偕
在城文武登陴死守。賊眾蠶至。兵寡不
支。城遂陷。維墀力竭陣亡。闔門殉焉。署
巡撫郭夢齡以

聞。

諭曰。此次失守文武各員。平陽府知府何維墀。被戕最慘。全家殉難。忠烈同心。殊堪憫惻。著交部從優議卹。尋

賞卹如例。

恩給雲騎尉世職。子喬壽承襲。

扎克當阿傳

扎克當阿。伊爾根覺羅氏。滿洲正黃旗人。由護軍於道光元年。補藍翎侍衛。五年。升三等侍衛。九年。揀發雲南。以都司用。旋補楚雄協中軍都司。十九年。升大關營遊擊。二十四年。升威遠營參將。二十五年。保山縣回匪馬大等滋事。踞猛

庭寨肆劫附近村莊。直逼永昌郡城。雲貴總督賀長齡偕提督張必祿帶兵進勦。扎克當阿在事出力。打仗二十三次。獲挑藥匪多名。奪火藥七石。二十六年。永昌逃匪以報復為名。糾眾復出。扎克當阿奉檄赴緬甯勦捕。二十七年。雲州回匪與緬匪勾結起釁。扎克當阿由緬

甯進兵。移營遲緩。雲貴總督李星沅以軍務不力劾之。因原其前功。以遊擊降補。歸部選用。二十八年。選山西撫標右營遊擊。三十年。調平垣營遊擊。咸豐三年四月。署平陽營參將。八月。廣西會匪由河南懷慶竄入山西。連陷垣曲絳縣曲沃。直撲平陽府城。扎克當阿激勵士

卒。竭力防禦。賊蠭至。眾寡不敵。身受重傷。力竭死之。城陷。闔門殉焉。惟一子得出。經署山西巡撫郭夢齡奏。

聞。九月得。

旨。交部從優議卹。尋

賞卹如例。

恩給雲騎尉世職。子隆祥承襲。

佟鑑傳

佟鑑。佟佳氏。漢軍鑲紅旗人。嘉慶二十五年。襲世管佐領。道光十一年。授印務章京。十二年。擢副參領。十九年。升參領。二十六年。遷印務參領。咸豐元年。升鑲黃旗蒙古副都統。三年八月。以粵匪入楚被勦。蔽江東竄。復分股由河南犯山。

西。

命選帶漢軍八旗神威銅礮十六位。礮兵四十八名。護礮槍兵二百四十名。並參領桂林。筆帖式文興等。偕新任山西巡撫恆春。前往堵剿。九月。賊由山西竄直隸。

欽差大臣勝保等。兼程追剿。抵深州。偵知分踞州城之賊。將圖出竄。豫設伏。截殲多名。

賊猶困鬪。適佟鑑督運礮位。由山西折回到營。遂率兵弁轟礮助戰。燬其壘。賊眾披靡。殪二百名。俘數名。餘匪遁與全股合。十月。由靜海青縣竄天津獨流。並分踞楊柳青等處。佟鑑偕勝保督隊踵至。於楊柳青襲擊。賊猝不及防。轟斃二百餘名。俘馘三十餘名。沿河溺斃無數。

奪獲船械馬匹甚夥。尋大兵合攻獨流。賊傾巢出拒。勝保飭總兵達洪阿等分隊於東西岸衝擊。各殪匪二三百名。賊復馬隊全集。勝保率吉林黑龍江官兵疾馳援應。復步行督戰。斬馘甚夥。佟鑑以神威礮從旁轟擊。並拴乘轎指揮。及轎前擁燾賊目二名。越三日。大兵分路

進攻。賊於迪南隄畔蟻聚以待。達洪阿等督隊奮擊。佟鑑偕總兵經文岱等以大礮及礮船相接應。賊不支。馬逸旗靡。死傷枕藉。餘匪遁回木城。勝保先後奏聞。得旨嘉獎。並

頒賞佩刀荷囊等件。十一月。賊以靜海股匪接

應出壘撲營。我兵縱橫擊走之。嗣復傾巢而出。我兵奮勇轟擊。賊不支。沿隄鼠竄。佟鑑思絕其歸路。身先士卒。進掣濠板。賊死拒。佟鑑手及數匪。忽以路滑失足。踣地。賊又叢集。遂遇害。奏入。

諭曰。鑲黃旗蒙古副都統佟鑑。管帶礮位。累次擊賊。疊著戰功。此次接仗。業已轟斃賊匪數

百名。乃因拽取濠板。被賊擁圍。猶復手執長矛。連刺數賊。身受重傷。登時遇害。忠勇血誠。覽奏不禁隕涕。著加恩追贈將軍。卽照將軍陣亡例。賜卹。入祀昭忠祠。並賞給二等輕車都尉世職。仍准其入城治喪。應得卹典。該衙門察例具奏。該員現無子嗣。著該旗於本族近支內。擇其應繼之人。卽為立嗣。承襲世職。

並著於陣亡地方。建祠置祀。以慰忠魂。尋
賜祭葬。入祀。

京師昭忠祠。

予諡剛節。四年。賊分竄山東。德州練勇。截獲賊
目王小湧。訊係戕害佟鑑兇渠。即伏法。
並摘逆心。於德州城外。設佟鑑位。致祭。
經山東巡撫張亮基入奏。

諭傳知佟鑑家屬。俾自行告祭。以慰忠魂。是年
二月。遺腹子佟澤沛生。由本旗都統奏
聞。得。

旨承襲二等輕車都尉世職。並襲世管佐領。



